



2. september 2025

Inatsisartut suleriaasianni § 37 imm. 1 naapertorlugu Naalakkersuisunut apeqquteqaat imaattoq matumuuna saqqummiuppara.

Naalakkersuisunut apeqqutit:

1. Ukiuni kingullerni tallimani (2020-2024) kommunit tamarmik ataasiakkaarlutik immikkut ukuninnga qanoq katillugit isertitaqarsimappat?
 - a. Suliffeqarfiit akileraarutaat (selskabsskat)
 - b. Iluanaarutinit akileraarutit (udbytteskat)
2. Ukiuni kingullerni tallimani (2020-2024) kommunit tamarmik ataasiakkaarlutik immikkut ingerlatsineri (drift) katillugit qanoq sinneqartooruteqarsimappat?
3. Ukiuni kingullerni tallimani (2020-2024) kommunit tamarmik ataasiakkaarlutik immikkut sanaartornermut katillugit qanoq aningaasartuuteqarsimappat?
4. Ukiuni kingullerni tallimani (2020-2024) kommunit tamarmik ataasiakkaarlutik katillugit naatsorsuutitigut qanoq angusaqarsimappat?
5. Inuttussuseq aallaavigalugu kommunit ataasiakkaarlugit 65-it sinnerlugit ukiulinnik qanoq amerlatigisunik innuttaqarnersut procentinngorlugit ullumikkut qanoq isikkoqarpa? Annertunerpaamik procentitaqartut siulliullugit allanneqarnissaat kissaatigaara.
6. Inuttussuseq aallaavigalugu kommunit ataasiakkaarlugit sulisinnaassusilittut ukiulinnik (17-64) ullumikkut qanoq amerlatigisunik innuttaqarnersut procentinngorlugit qanoq isikkoqarpa? Amerlanerpaanik procentitaqartut siulliullugit allanneqarnissaat kissaatigaara.
7. Paasissutissat qulaani saqqummiunneqartut aallaavigalugit kommunit akornganni aningaasaqarnikkut inissisimaneq Naalakkersuisut qanoq nalilerpaat?

(Inatsisartunut ilaasortaq Anders Olsen, Siumut)

Tunngavilersuut:

Innuttaasut akornanni naligiinnginneq annikillisarniarlugu akileraartarnikkut aaqqissuusseqqinneq ingerlanneqarnikuuvoq, tamanna innuttaasut isertitakinnerusut eqqarsaatigalugit imminermini pitsaasuvoq.



Taamaattorli ernumanartutut isumaqarfigaara, kommunit akornanni naligiinnginneq annertusiartuinnartutut isikkoqartoq, sumiiffimmullu ataatsimut eqiterutsitsineq annertusiartuinnartoq politikikkut piaartumik qanoq iliuuseqarfigineqanngippat, kommunit ilai inukkilliartuinnarlutillu ammuinnaq ingerlanissaat. Tamannalu uagut kalaallit ilisarnaatiginngilarput. Eqqaamassavarpummi Kalaallit Nunaat ataasiuvoq! Kommunillu tamarmik pingaartinneqartutut ineriartornermullu peqataatinneqartutut misigisimanissaat Naalakkersuisut aamma akisussaaffigaat.

Apeqqutigineqartut ullut suliffiusut qulit iluanni akeqquneqarput.